

- 5 **E**ffulsit fidei luce fidelis,
Princeps egregius semper in orbe,
Iustus iudicio, famine uerus,
Hostis falsiloquis hic erat acer.
- 6 **F**ultus presidio numinis alti,
Ducens castra sibi fortia Christi
Strauit barbariem, fanaque triuit,
Cultureque dei templa dicauit.
- 7 **G**estis preposuit cuncta potenter,
Sic pulsus tenebris ore prophanis
Struxit christicolis castra salutis,
Barchinona potens, te renouauit.
- 8 **H**ic per iusticię limina cedens
Prebebat populis iussa salutis,
Ut uiuendo pie regna subirent
Celestis patrię post sine fine.
- 9 **I**lli cura fuit maxima regni
Scissuras placido stringere pacto,
Discordesque sibi nectere mentes
Primo nequitię fraude repulsa.
- 10 **K**arus hic populis extitit orbis,
Qui famam meriti transtulit astra,
Et celso micuit nomine terris,
Ut sol in radiis orbe refusis.
- 11 **L**ux ingens patrię, gloria terre,
O Raimunde, tuis quam pius olim
Domnus more patris cunctę fuisti,
Qui scalam emeras tristibus omnem.
- 12 **M**iro uos, inopes, fouit amore,
Vestri tutor erat dulcis et altor:
Nam quod seua manus sontis ademit
Vobis restituit, iure peregit.
- 13 **N**am sacrata dei templa beaut,
Donis eximiis et decorauit,
Et clerum patrię fouit honeste,
O Borrelle magis inclite presul.
- 14 **O** quę christicolis urbs sat Olimphi
Terragona piis clara stetisti!
Te prisco statui ferre parabat,
Hinc ornare tuam presule plebem.